



**Sud Bosne i Hercegovine**  
**Суд Босне и Херцеговине**

---

**Broj: S1 3 P 039154 20 Iž**  
**Sarajevo, 14.12.2020. godine**

Sud Bosne i Hercegovine, u drugostepenom vijeću sastavljenom od sudija Zvezdane Antonović, kao predsjednika vijeća, Dr Branka Moraita i Mirsade Džindo, kao članova vijeća, odlučujući o žalbi političke stranke "Posavska stranka" (PS), Orašje, 3. ulica 2g, zastupana po predsjedniku Ninoslavu Šušiloviću, koja osporava Odluku Centralne izborne komisije BiH o odbijanju zahtjeva za ponovno brojanje glasačkih listića u osnovnoj izbornoj jedinici Orašje za nivo Općinskog vijeća, broj 05-1-07-1-1568/20 od 09.12.2020. godine, u nejavnoj sjednici, održanoj dana 14.12.2020. godine, donio je

**R J E Š E N J E**

Žalba se odbija.

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum u uvodu, odbijen je kao neosnovan zahtjev političkog subjekta „Posavska stranka“ za ponovno brojanje glasačkih listića na sedam biračkih mjesta u osnovnoj izbornoj jedinici Orašje za nivo Općinskog vijeća.

Protiv ove odluke žalitelj PS je izjavio žalbu zbog povrede zakona i pravila izbornog procesa, nepotpuno i nepravilno utvrđenog činjeničnog stanja i pogrešne primjene materijalnog prava. Žalbom ukazuje da je njihov zahtjev od strane CIK BiH paušalno odbijen, a da bi imali još jedan mandat da nije bilo krivotvorenih glasova i da se iskoristila mogućnost ponovnog brojanja po službenoj dužnosti.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da **žalba nije osnovana**.

Centralna izborna komisija Bosne i Hercegovine, je u konkretnom slučaju, ispitala sve navode zbog podnesenog zahtjeva za ponovno brojanje i pravilno utvrdila da nisu nađene nepravilnosti koje mogu uticati na rezultate glasanja, odnosno je utiču na dodjelu mandata te da iz tih razloga CIK BiH nije koristila

mogućnost iz odredbe člana 5.30 stav (5) i (6) Izbornog zakona BiH i naredila po službenoj dužnosti ponovno brojanje glasačkih listića na 7 biračkih mjesta u osnovnoj izbornoj jedinici Orašje za nivo općinskog vijeća. To proizilazi, prema stanju u spisu predmeta, iz pravilno utvrđenog činjeničnog stanja, jer je CIK BiH pravilno utvrdila da je podnosilac žalbe u osnovnoj izbornoj jedinici Orašje za nivo općinskog vijeća osvojio 170 glasova i nije osvojio niti jedan mandat, a da je politički subjekt, Hrvatska stranka prava BiH koja je osvojila poziciju ispred žalitelja, osvojila 190 glasova i dobila jedan mandat u Općinskom vijeću Orašje, a da razlika od 20 glasova ne utiče na pravilno utvrđene izborne rezultate i dodjelu mandata.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA**  
**S U D I J A**  
**Zvezdana Antonović**